

Imagio personal al Dottor Tite Corgnâl.

N. 13-16

Presit cun Ciarte dal Friûl Orientâl fr. 5, sençe 0.40

C. C. Postale

31 Zenâr 1931 - IX

ARCHIVI DE LETERATURE FURLANE

ANTIGHE E MODERNE



FONTANE DI ZUÂN DI UDIN

CHESTE DISPENSE 'E CONTÈN

Ciarte pratiche dal Friûl Orientâl pag. 148-163

In diêse da-l'Archivi " 74

I-Santi del Friuli (recensìon) " 76

La Dutrine cristiane in furlân . pag. 77

Diplomis " 79

Spiegaçion de Ciarte dal Friûl " 80

**Abonamént a dîs dispensis da-l'Archivi fr. 12.50 (anticipâç) par l'Interno e 15 par l'Estero
Udin, Plaçe Vitòrio Em. 9 A, 2nd plan — Cont Corint Postâl 8-69**

In difese da-'l-Archivi

(Continuación)

In ravuárt a la prime questión al pararèss che lis vòs popolârs dovarèssin 'vê la terminación in *isim* (*catechisim, batisim, senapisim, gargarisim, reumatisim, fanatisim, mecanisim, inciantisim, cristianisim, soçialisim*) e invecit chês dotis la terminación in *ismo* (*barbarismo, esorcismo, turismo, automobilismo, alcoolismo*).

Si noti però che dulà che il todèsch al dîs *Gallicismus, Italianismus, Hellenismus, Barbarismus*, il slovén al dîs *latiniz'em, socializ'em, katekiz'em, katoliciz'em* quindi la tendence del Friûl Orientâl a doprâ il sufiss *isim* o *esim* 'e sarèss spiegade da la analogie cu'l slovén. In ogni mûd ches-c vocábui cun une teminación o l'altre esistin in dutis lis lenghis europeis di culture.

Rispiêt a l'altre questión, che inveci di *talianismo* si scugni dî: *peráule derivade o ciolte d'imprèst dal talián* nò sin afât persuadûc parcè dutis lis peráulis di un lengaç, manco qualche cês plui che straordenari, son derivadis da altris lenghis maris o sùrs; inveci cun chel *sufiss* si intind di dî che si trate di *une peráule ciolte d'imprèst da une lenghe benchè nò-l ocorèss parcè che a-nd-jere za un'altre afât popolâr che esprimeve l'indéntiche idee: dedâl, ziziâl, freno, serpint, maçèt* son *talianismos* o *venetismos* parcè che za esistin in furlán *vignarûl, slaif, madrách, bochè* che son popolârs e ches-c nò si puedin clamâ *germanismos, slovenismos, o francesismos* benchè e' seín derivâc dal todèsch o dal slovén o dal francès.

Il sufiss *ismo* cun chest valôr speciâl in linguistiche al vâl duncè ance pa-l furlán come par dutis lis altris lenghis di culture.

Se pô si volèss intindi che il furlán 'l-è un dialèt ne-l quâl nò puedin jentrâ peráulis tècnichis o científichis, sin d'acordo manco che mai.

Se *italianissem* si ciâti-lu 'te gramátiche ladine di Velleman, parcè nò puédi-al apartignî cun majôr drit al lengaç furlán?

Se chest e tanc altris vocábui científichis e' ocorin a la popolaçion de Engiadine che sume a 30-35 mil ánimis e che abite une valade il cui plan l'è alt sul mâr come Sáuris o Culine, dulà che sençe l'indústrie dai furistîrs nò si tratarèss altri che di pastorîe e di silviculture, parcè nò han-o di coventâ ai sièt o votcènt mil furláns che nò han nome montagnis e valadis, ma ance culinis, planure, palûç, lagunis, mâr e si pò di ogni spècie di indústriis, di trafichis e di ativitât materiâl e morâl?

A provâ pc' che dutis lis lenghis han un grum di peráulis forestis basti ricuardâ il *Fremdwörterbuch* di Heyse dal 1873 cun 992 páginis, chel di *Kehren* dal 1876 cun 772 pág. pa-l todèsch, e il *Slovarček tujih besed* di Lestan dal 1918 che al dà la traduçion in slovén di dutis lis peráulis forestis penetradis abusivamente o sençe bisúgn in chest lengaç, i puris-c de quâl lenghe e' smirin a fâ sostituî lis vòs internasionâls *telegráf, teleskóp, fizika, geografija*, cun *brzójav, daljnogléd, prirodoslovje, zemljepris*. Il purismo 'tal lengaç al covente specialmentri 'tes naçions che son stadis a lungh sot il jôv e da pôch timp ricognossudis 'te lôr autonomie. Itálie, Germánie, Inghiltere, France puedin siarâ sençe pôre, cui un cui duc-i-doi i voi rispiêt a purismo.

Stil talián - furlán

L'è verissin che il nestri mûd di scrivi 'l-è italo-furlán e che si trate di matèrie pensade par talián o par venit. Ma di cui la colpe se 'te scuele, in teatro,



'tes públichis conferençis, in glésie, 'te corispondence, 'tai ufiçis, 'tai giornai, 'tai libris nò si dopre altri che il 'talián o un lengaç che al imite il talián? E ance se 'l-è un libri scrit dut par furlán si met almanco il titul par talián, o se l'ha il titul in furlán, come *Panarie* e *Ce fastu*, dut ce che nò-l-è diálogo o racónt populâr o poesie, l-è esponût in lenghe taliane.

Guai po' se un che al vess studiât 'tes scuelis todes-cis o slovenis al pensáss in todèsch o in slovén.

Fin dal 1880-83 il nestri Ascul ne-lis *Annotazioni al Barlaam e Giosafat soprasilvano* (Vol. 7^{im} da l'Archivi Glotologic) 'l-ha tratât di cheste questión in tre ciapítui intitolâc: *Materia romana e spirito tedesco*; *Materia tedesca e forma romana* e *Rude materia tedesca* (pag. 556-573).

Si trate duncè di un peciât vècio in part compensât da la circostance che se 'e son ladíns che si butin sençe savê de bande dal todèsch, a-nd-jé altris che misclîçin la lor lenghe cu-l talián e altris cu-l slovén o cu-l serbo-croât di Résie e, dut somât si vará une tendence naturâl a stil e vocábui internacionâi: la qual ciosse, dal pont di viste di chei che cialin viárs l'avignî, jé dut altri che un mâl.

Quând che ogni naciòn 'e gioldará la so indipendence, si lassarán penetrâ 'te lenghe pátrie vocábui forès-c sençe pericul che l'imbastardimént dal lengaç al vedi influence su la libertât.

Sin duncè d'acordo che si ha di cialâ plui che si pò 'ta-l furlán a la pureçe sei dai vocabui che dal stil. A chest scopo ocôr scrivi il furlán in ogni ocasiòn. Inveçe in prátiche si scrív e si fevele par talián ance dula che nò-l coventarèss. Si scomeçî dal scrivi simpri in furlán e dopo si criticará.

Il pussibil avignî dal furlán

'L-è stât dit 't-e critiche che il nestri modèst vernacul (parlare) *nò-l-é e nò-l-há*

di diventâ une lenghe leterarie. Forsit si intindeve dí *lenghe di culture* suficiènt par duc i bisúgns dal popul che la dopre parcè che lenghe *leterarie* jé bielzá dal momént che jé doprade sei p'e poesie che 'te-s comèdiis.

Ma alore, se nò si viòd 't-al furlán nissún avignî, nissune probabilitât che al rivi al pont viárs cui 'e smire ogni lenghe, si domande: parcè prolungiâ la so agunie, la so vite físiche, cu-l'òpare multiforme de Filològiche? Parcè tant lavôr propri di band, sençe un scopo ben determinât? Nò si volarà fâ crodi che a' sedin in Friûl tre mil personis che si òcupin dal studi scentifich da-l propri lengaç. I filòlogos che son tâi e che si interessin in mûd speciâl dal furlán e' sarán sí e nò une dozene in dut il mond.

Se po' si cultivè il furlán cu-l'intençión di vè a disposiçión une venute limpide e pure che alimenti la gran flumère dal lengaç talián, piès cun piès, zaché dute la Toscane cu-l'Umbrie e la Campagne di Rome han vonde risultivis populârs par alimentâ la lenghe taliane dulâ che ju scritôrs di lustri-fín puedin aurî, come 'l-ha fat par esempi Páscoli, vocábui e mûc di di originâi.

Se mai i gnuvs tiarmins e frasis dovaressin sei ciòlç sù da dutis lis lenghis dal mond e speçialmentri da chês che plui si imponin pa-l svilúp scentifich, technich, industriâl, comerciâl, sportiv dai pòpui rispètivs. E prime di dut, se il talián al bramáss di incorporâ vocábui forès-c ma necessáriis, al varèss dât forme naçionâl a perâulis come: *fiord*, *geiser*, *pack*, *notes*, *curaçao*, *hangar*, *handikap*, *kellerine*, *pilaf*, *tukul*, *etager*, *satín*, *slivovitz*, *craut*, e un grum di altris.

Vocábui che almanco in part 'a mancin e che podaressin penetrâ tal talián saressin par esempi *pustòt*, *crei*, *screâ*, *disniçâ*, *criure*, *çúrie*, *clip*, *ronch*, *conole*,

laîd, lisp, lutâ, reonâ, rampid, travanâ, zornâ, grèbano, crâssigne, pistûn, gubane, ceolarie, pale (di mont) *clap di vinture.....* Ben? Isâl forsi stât assimilât qualchidûn di ches-c da la lenghe taliane? O is-e sperançe che cheste assimilaciôn si verifichi par l'avigni? Nance par insiûm. E po', se realmentri si vess cheste intençiôn bastarèss preâ ju studiôs di proponi i vocábui manciânç al talián che l'Acadèmie de Crusche dovarèss acetâ o scartâ. Par otignî chest nò-l ocôr afât il complèss e multiforme programe de Filològiche, ma un procedimént une vore plui simplç e plui sbrigativ.

In conclusiôn la difese e la coltivaçiôn di un dialèt (e tâl 'l-è ritignûl il furlán da l'universalitât) e' son danôs a la generalizaçiôn de úniche lenghe naçiônâl amitude. E parcè po' permeti la conservaçiôn dai dialèç dal momént che si tind ad abulî l'insegnamént des lenghis dei aloglottos come il francès, il todèsch e il serbo-croát cu-l sloven par considerà nome lis principâls?

Da chestis, se mai, si varèss ce aurî ben plui che dai dialèç, parcè che il lôr teritori al si estînd sore quasi dute l'Europe in confrónt de sole Itálie che a mièç dai vernáculi varèss di alimentâ il talián.

Si poderèss ance rimarcâ la tenácie dai Furláns a rivendicâ la toponomástiche furlane, mentre e' son fra i plui acanîç a combati chê todes-ce e chê slave. No-l-è just dâ une man a struciâ i altris mentre une soflade e pò parâ-nus vie duc-quânc. Se si pretînd di mantignî il nestri vernacul bisugne acordâ che ognûn difindi chel che j stâ a cûr.

L'Archivi al sostèn il furlán par un scopo plui logich, pratich e di utilitât, se nò imediate, par l'avigni che nò-l si presente serèn e facil par un pignât di crep, come ch'al-è il nestri país, mitûd fra dôs

ançi tre bronzíns. Il Friûl, e se si ûl dute la Ladinie, dovarèss sei, cu-l so lengaç particolâr, che al costituisc la so bandiere, la so marche distintive di fábriche, la insegne caraterístiche, cui siei costúms e lis sôs tradiçiôns, il lûch di convegno comûn a scopo pacifich di sgámbio di ideis e di mercançis fra lis tre stirpis confinânç che lu abraçin val-a-dî la latine, la todes-ce e la slave, un lûch, ripetin, di pacifich convegno e incontro, una speçie di Svîçare orientâl che dal Gotardo va fin al mâr e che servirèss, su terèn neutrâl, a ualivâ diferençis e bonâ contrás-c. Che se po' qualchidûn al vess intençiôns belicosis chest país al sarèss destinât a formâ il baluardo, la murae de Chine o il valo des Alpis Juliis fat sù par tignî lontáns i barbars e par tignî a dovê i maç. Al restarèss sotintindûl che se si ciátin di chêi che volèssin propri fâ apelo a lis armis che si comudin pûr, ma che vadin a báti-si e a fâ il desio fûr di ca. Noaltri a-nd-j-vin vût vonde.

Si capisc che duc nò son di cheste 'pinión parcè la uere e l'invasiôn ju ha faç di pitòchs diventâ siôrs o di pedóns diventâ cavalîrs. Ancie il pes-ciadôr al ciape plui pesc quan che l'aghe jé túrgule, quindi une plene, une inondaçiôn, che ruvine un estès teritori, jé la risorse par qualchidûn.

I SANTI DEL FRIULI - 160 pág. cun 20 táulis; 7 franchs

(Editôr Pieri Zampe, Predemán)

(Continuaciôn de recensión)

Jé esponude la vite di 25 fra sanç e beaç e di 14 santis. Di 27 umin e dôs fêminis marturizâç e par consequence canonizâç, nòl-è citât che il non, zachè stòrie e tradiçiôn nò azonzin nissûn particolâr.

La trascurateçe sei da part de

autoritât eclesiâstiche, che dai devoç (lis onoranzis a S. Paulin nel 1902 e chês al beât Odori dal 1931 formin eceçions) ravuârt ai sanç e beaç furlâns jê veramenti fenomenâl tant che la ben cognossude sentençe si podarêss parafrasâ-le disint che nâncie i sanç e son tai 'ta-l lôr*paîs val-a-dî 'te pròprie Pâtrie, cu-la conclusion che ognûn al pô rigiavâ.

Il letôr stess da l'elenco dai sanç furlâns (in cui metin fra paréntisi chêi di cui si cognòsc il sôl non) al po' calculâ tropis personis, paîs, glésiis, altârs, quadris, imâginis, incisions, contradis, placis, puartin in segno di omagio ches-c stess nons in confront cun chês personis od ogêç che puartin nons di sanç forêsc: Bisugne tignî ance presint che in qualchi câs il stess non 'l-è puartât da un Sant forêst al qual si é pensât 'ta-l assegnâ il so non:

Ermâcore o Macôr, Fortunât (doi) Giovénçio, Pio, Ilari, Taçian, Felic (doi), Crisògono, Anastasi, Cànçio, Cançian, Donât (doi), Solòn, Zòilo, Valarian, Cromâçio, Eliodoro, Nicete, Anselmo, Rachis, Paulin, Odorico o Duri, Bertrând o Beltrâm, Zuan-Dree, March (doi), (Largh, Dionisio o Nisio, Crisanto, Secondian, Romul (doi), Eutichio (doi), Just, Silvân (doi), Policrinio, Neomèdio, Corado, Ermògio, Venusto, Giovín, Clemènt, Sisto, Marçiâl, Emèrito, Arito, Vitorián e Vitôr); Eufèmie, Dorotee, Tecle, Erasme, Anastásie, Cançianile, Ciríache, Musche, Colombe, Tísie, Epifánie, Pertrude, Benvignude, Élene, (Lucile e Marie).

Si pensi che fra la muárt di Zorút e il dopo-uere in cui si è tornât a stampâ regolarmenti un strolch furlán, i lunariúc che par miêç secul e' han corût il Friûl son stâç stampâç a Milán, Turín, Firence, Codogno, ecèt. par dut fûr che fra nô e quindi sençe i canonicâç furlâns.

Al pararêss che onorâ i sanç locâi

cu'l miêç di incisions, libruc od altri, al sarêss un compit plui adatât ai religiôs che nô, par mûd di esempi, ostegiâ, e chel che l'è piês sençe risultât, il bal che 'l-è in fin dei faç un passetimp di duc i pòpui e di ogni èpoche. L'om 'l-ha il dirit al divertimènt e a la distraçion come lu ha a la libertât, a l'istrucion, al pan, al lavôr....

Brao adúncie siôr Pieri par l'òpare veramenti meritòrie che 'l-ha compide finore, e che nus prepari simpri gnovis e gradidis improvisadis e che nò-l piardi il corágio e che nò-l bandoni la so passion editoriâl ance se 'l-incontre oposicions, contrarietâç e dificoltaç e se nò-l-è laudât come che al merete. Che al si consoli pensând al proverbio: 'E dis la Sante Scritture che al scugne lavorâ chel che 'l-ha la piel dure. Che in vite al scugnarâ strusciâ-si, e magari tirâ-le, ma dopo muárt j metarán une lápide su la so ciasute.

La dutrine cristiane in furlán

L'Archivi l'ha podût 'vê un *Compèndio di dutrine in tre classis*, scrit in biél caratar in neri e ross ch'al-òcupe un librút di 133 fassadis in 16^{im}. Nò si rileve il non di cui lu ha scrit. Al pâr nome di lêi lis iniçials F. Z. Su-l'últime págine in caratar infantil si note il non di Giulia Ostermann e la date 1851. Il manoscrit al-è adúncie indubiamènti de prime metât dal 19^{im} secul.

Di un librút análogo si é dât relaçion a pág. 255 dal *Tesaur de lenghe furlane*, ripuartând qualchi ságio. Libruc someanc nò mancín 'te's pátriis bibliotechis e ançi si dovarêss ciatâ-nt in dutis lis canònichis o sagristiis dal Friûl parcè in passât, e in qualchi lûch ancemò, la spiegacion de dutrine ven fate, in omágio a lasane tradiçion,

esclusivamentri par furlán. Disgraciata-mentri ogni volte che al mûr un pleván o un capelán i libris, pôs o trosce che al possedeve, invece di restâ, debitamentri inventariâç, in canòniche o in sacristie a disposiciòn dai sucessôrs, e' son ritirâç dai erêç, generalmentri contadîns, e po' e' van butâç vie. 'Ta-i paîs de Ladinie centrâl (Val Gardene, Badie e Curtine d'Ampèç) in ogni canòniche, oltre l'archivi, esist une biblioteche che jê dal benefici e che il titolâr 'l-ha l'obligh morâl di conservâ e meorâ.

Di dutrinis publicadis in furlán si ha notiçie di chês stampadis a Udin nei aîns 1770, 1776, 1778 (in lenghe ciargnele, ma 'e jê in sclet furlán), 1791, 1792, 1801, 1802, 1865, 1883 e cheste sarèss l'últime ediciòn, e a Guriçe dal 1773 e 1851. Cheste últime jê in dialèt guriçân, èdite de tipografie Paternoli e ancemò in comèrcio.

Dal 1820 l'esist un libri di prejeris stampât a Guriçe, compilât par ordin dal Vescul Fusèt 'te prefazion dal quâl si lèin chestis peráulis, degnis di sei medita-dis, diretis al popul furlán:

"I todèschs, i cragnulîns han lis lôr "prejeris nel lôr lengâç, parcè nò varesiss "di vè-lis áncia vo? e parcè dovaressiss "preâ in un lengâç che o nò capis-o "afât o nò capís tant quánt la 'uestra "pròpria lenga?," e al continue un-mònt judiciosamentri come si pò lei sul Tesaur citât a pag. 259. Al vegnarâ il moment in cui il non di chest vescul al sarâ sculpît su-l marmul par chestis peráulis.

Un deplorevul *ukase* da l'Arcivescul Rossi, (che Dio j perdoni), par chest rivuârd di pôch gradide memòrie, 'l-ha ordenât di abulî la predicaciòn in furlán. Par fortune diviârs e' contínuin a doprâ áncie in-te predicaciòn la lenghe che il popul al capísc e a spiegâ la dutrine come par antích. Ma par trop timp

presistaran-o ches-c pôs che van daûr il bon sens, a seguî la vècie tradiçìon, se nò sarán sostignûç e incoragiâç seriamenti?

Ben, si domande: Se la tant benemèrite Filològiche 'e ûl veramentri che il furlán si conservi e magari al torni al'antighe difusiòn, ce miei che publicâ une dutrine e lis oraçions in furlán *naturalmentri secònd un test che ai sei aprovât da lis tre diòcesis furlanis?

Va benón il *Stroligh* ancie se nò-l stròlighe piç, e il *Ce fastu?*; stupendamentri ciantosis, comèdiis, bai, fiestîns, congress, banchèç, prîndis, trincadis e miezis stechis....., ma se si ûl 'vê un libri che al pènetri in dutis lis cent mîl e plui tameis furlanis bisugne propit publicâ la dutrine e lis oraçions in furlán. E parcè po' 'ta-l'Engiadine, dulâ che vivin i nestrîs fradis ladîns di religiòn evangèliche si ten une prèdicie par ladín ogni 7-8 par todèsch? precisantri come ca une par furlán ogni cui sa ce tantis par talián? A cheste domande il majôr poete vivént di chê valade, Peider Linsel, nus rispuindeve: I pastôrs prèdicin di preferençe in todèsch parcè e' ciatin sui libris lis prèdicis za prontis in chê lenghe. Invecit, se uelîn esprîmi-si in românc, e' scugnin scrîvi-si il sermón di zonte fûr e po' studiâ-sa-l. E si capísc che la majôr part e' procurin di sparagnâ timp e fadie essínd chest propri de umane nature. Ancie ca di nò 'l-è l'istèss, spècie dopo la maláugurate esortaciòn dal arcivescul, che l-è stat mandât pa-i trois dai prelâç e dal clero furlán, e dopo che i predis viodín che il prediciâ par talián l'è un coeficiént par otigni qualchi onorificençe. 'Te-s bibliotechis (ancie in chê da l'Archivi) 'te's canónichis, 'te-s sagrestîis esistin in quantitât prèdicis manoscritis furlanis e nò sarèss che di fâ une scielte par òpare di un competént e stampâ-lis come guide di chêi che

scugnin prediciâ 't-e lenghe de popola-
ción. La Filològiche in ubidiènçe al so
statût 'e varèss quindi un terèn vastissin
di cultivâ sul sèrio, ma propit sul sèrio.

Plui di qualchidùn, specialmentri dai
vècios liberâi al stuarzârâ il nâs in
presinze de fate propueste.

Se-non-ché si dovarèss considerâ
che la tendènçe principâl des religiôns
jé ché di mantignî lis tradiçions sot
forme di ricorençis, solenitàç, ritos, ceri-
móniis, funcions, vestimènc, apàràç, co-
stúms, ciànç, prejeris e cu-l doprà 'tal
culto lenghis antighis non plui capidis
dal popul (latin, paleoslâv, sanscrit ecèt.)
che circondin lis funcions di un ciárt
misteri, nel mentri la religiôn catòliche
'e ha il merit di doprà, almanco te predi-
cations e 'te spiegacion de dutrine e
dal Vanzeli e di spess 'tes oracions, la
lenghe che jé su-la bòcie dal popul. Se
si ûl dúncie conservâ e nobilitâ il lengâç
popolâr si scugne pojà-si sore une istitu-
cion che ha radris profundis 'te ánime,
de înt cu-la quâl 'e jè in comuniôn di afièç
e di aspiracion. La religiôn cristiane-
ortodosse 'ta-i païs balcanichs 'e ha
conservât lenghe e tradiçions nacionâls

durânt la funeste dominaçion otomane
avínd alimentât l'òdio cuintri l'opressôr
che 'l-ere diferént, oltre che di lengâç,
ance di religiôn. La bandiere de riscosse
jé stade propri inalberade dai popis o
predis ortodòss che da vèrs uerîrs han
guidât il popul impugnând la cròs e la
spade 'te guere di indipendènçe e sufrínd
ogni martiri da part dai turchs.

Lis personis spegiudicadis dai nestris
païs che nò son propensis a la Glésie
quánd che nò jè esclusivamentri ed inten-
samentri moralizatriçe ed educatriçe in
mûd di cooperâ cu-la famee e cu-la
scuele, 'e scugnaressin jessi ben dispo-
nuds viârs la istituçion stesste quân' che
la viódarán declarâ-si pronte a difindi
la lenghe che costituisc la bandiere de
piçule Pátrie. In chesst mûd la Glésie
'e po' acquistâ-si áncie ca di nò ladíns
un titul di benemerence imperiture da
part dei citadíns non rineâç precisamen-
tri come 'te penisule balcániche dulâ che
j son debitòrs de libertât e de indipen-
dènçe, e nome in chesst câs la Glésie e
pò clamâ-si naçionâl e identificâ-si cu-la
naçion.

DIPLOMIS

'L-è stât assegnât il diplome, di incoragiament o elògio, a chesstis personis :

Par 'vê ditis sú vilotis : Vergínie Glin, Marie Tusuline, Liduine Morèt, Ane Morèt, Romilde Cumúç, Valè Irme Marcobèl dutis di Felèt, Marie Ciandete di Tavagnâ, Marie Colaút di Tresesin maridade cun Ricobèl di Padiâr Udinês, Rose Franzuline di Baldassarie, Adele Palme maridade Globe di Padiâr.

Par 'vê ditis sú oracions populârs : Elde Borgobèl di Padiâr di Udin.

Par 'vê ditis sú flabis e bazarletis : Genio Clociât di Baldassarie, Nadalín Vígíe di Travès maridade Fontanúç, Madalene Grápin di Udin.

Par 'vê ditis sú a memòrie poesiis dal Libri des Vilotis di Reane, componûd da Zampâr : Vigi Comúç di Tavagnâ.

A cheste dispense jé unide la

CIARTE DAL FRIÛL ORIENTÂL

a la s-ciale di 1 a 100.000, val-a-dî di un centímetro par chilòmetro, che contén dutis lis indicaciòns prátechis ocorinç al'om di afârs e al turiste, val-a-dî: stradis, alteçe sul mâr, numar di abitânc e superficie in ètaros di duc i comúns, distinçión fra i circondaris, i mandaménç, i comúns restâç e chêi soprimûç; par ogni común o fraçión 'l-è indicât il Sant al quâl jé dedicade la glésie, il grâd de steshe (arcipretâl, decanâl, parochiâl, viciariâl ec.), la date des solenitâç religiosis e folchlorístichis (sagris), la sede di duc i uficis e des istituciòns scolástichis, sanitáriis e di beneficence.

Biblioteche da l'Archivi: N. 1: Vilotis gnovis e variânc di chès cognossudis

Edición di 80 esemplârs pa-i sôl abonâç da-l'Archivi. Il libri di cirche 150 páginis al saltará fûr in fevrâr.

L'Aministraciòn da-l'Archivi - Udin, Place Vitòrio Em. 9 A

Cont corínt postâl 8-69 — 'e vend:

Pátrie Ladine Vol. I. pag. 280 di cui 40 a stampe e ilustradis . Fr. 12

" " Vol. II Prospettive delle Industrie turistiche nel Friuli, pag. 998 „ 27

" " Vol. III. L'Atlante linguistico italiano con un saggio di atlante emiliano - romagnolo di quasi 100 carte, pag 192 . „ 6

Edición in autografie di 80 còpiis. - I tre volúms nò si vendin separatamentri.

Tesáur de lenghe furlane - 5 fascícu in quárt di fisse autografie pag. 826. Da pag. 552 a pag. 783 si han 4493 vilotis furlanis cu-lis variânc.

'Ta-l'òpare son comprindudis 16 páginis di músiche furlane incise che contegnin composiçions di Zardín e di altris, il Stroligh furlán di Zorút pa-l 1921, un fasciculút di 72 páginis in cui si confronte il vocabulari furlán cun chel dal provençâl, une ciarte geográfiche dal Friûl a la s-ciale di 1: 200.000 di un metro par 0.76, e une linguístiche di dute la Ladinie a la s-ciale di 1: 600.000.

Presi complessív franchs 57. — Edición di 80 còpiis. — I fascícu nò si vendin separâç

Sentimenti ed affetti nella poesia popolare friulana - 2 fascícu a stampe Fr. 6

Gerènt responsabil A. Tilín

Stabilimént Tipo-Litografich **BEPO TABÀCH** — Sandanèl dal Friûl